



UNIVERSITÄTS-
BIBLIOTHEK
PADERBORN

Claudii Fleurii Abbatis Historia Ecclesiastica

Ab anno Christi 1729. usque ad annum 1731

Fleury, Claude

August. Vind. [u.a.], 1785

VD18 13322648

§. 24. Motus contra Lectiones de S. Gregorio VII. Papa exitati.

[urn:nbn:de:hbz:466:1-67677](https://nbn-resolving.org/urn:nbn:de:hbz:466:1-67677)

octava Decembris præter alium magnæ
Crucis Equitem adhuc alii novem Com-
mendatores adjugebantur.

Sæc. XVIII.
A. C 1729.

§. XXIV.

*Motus contra Lectiones de S. Grego-
rio VII. Papa concitati.*

Jam anno Christi millesimo quingen-
tesimo octogesimo quarto Grego-
rius XIII. in Martyrologio Romano a
se emendato memoriam fieri jufferat
S. Gregorii VII. Pontificis cum hoc e-
logio: *Salerni Depositio Beati Gregorii Papæ
septimi, Ecclesiasticæ libertatis Propugna-
toris, ac defensoris acerrimi.* Non de-
erant, qui honorifica hac mentione stu-
diose Henrici IV. Imperatoris exaucto-
rationem in memoriam ideo revocari
criminabantur, ut eo facilius Henri-
cus IV. Navarræ Rex a Franciæ solio
arceri posset. Horum tamen cavillatio
adeo tum flocci habebatur, ut ipse e-
tiam Paulus V. Pontifex anno nono
sæculi decimi septimi primum indulge-
ret, ut ejus festum publico cultu ce-
lebraretur, ac de eo Officium cum pro-
priis Lectiõibus & oratione a Salerni-
tano Clero, id præcipiente Joanne Bel-
trano de Gueverra Archiepiscopo Sa-
lernitano, recitaretur, ipsis etiam Flo-
rentinis ac Senensibus pari cultu hunc

Sæc. XVIII.

A. C. 1729.

S. Pontificem venerantibus. Postea Alexander VII. idem officium in omnibus Romanæ Urbis Basilicis, & Clemens XI. Annis 1704. & 1705. ad Gabrieli Cardinalis preces a Cisterciensibus, necnon Anno 1710. a Benedictinis recitari voluit. Tandem vero Benedictus XIII. hoc ipsum Officium ad omnes utriusque sexus Clericos tam sæculares, quam regulares extendit: Eo fine Tedeschio, qui tum S. Congregationi Rituum a secretis erat, in mandatis dedit, ut decretum conficeret, vi cuius hoc officium Romano Breviario infereretur, omnesque Clerici in universa Ecclesia Officium, scilicet orationem & proprias tres lectiones secundæ, ut vocant, *Nocturni* recitare tenerentur. Edito hoc decreto in variis Provinciis juxta Romani exemplaris normam quatuor paginis impressum divulgabatur hoc Officium, in cujus secunda lectione hæc legebantur verba: *contra Henrici Imperatoris impios conatus fortis per omnia Athleta impavidus permansit, seque pro muro Domui Israel ponere non timuit, ac eundem Henricum in profundum malorum prolapsum, fidelium communionem Regnoque privavit, atque subditos populos fide ei data liberavit.* Quæ tamen verba in Officio, quo sub Alexan-

xandro VII. Romanæ Urbis Basilicæ Sæc. XVIII.
 utebantur, non erant contenta. A. C. 1729.

Vix hoc folium Gallici Regni fines attigerat, cum illico quædam Franciæ Parliamenta sese ei opponerent, ac Regiam auctoritatem, Regni jura & Ecclesiæ Gallicanæ libertates lædi vociferarentur. Præcesserat ceteris Parisiense, quod paulopost Metense & Burdegalense & Britannicum sequebantur. Verum intempestivos horum ausus Cardinalis Fleuryus primus Regis Administer suppressit, dum hanc temeritatem eis acriter exprobrans, inhiberet, ne hac in re quicquam inconsulto Rege, attentaretur: Insuper supremus Regni Cancellarius ad omnes Parliamentorum Præsides rescripsit, vetuitque, ne ipsorum Procuratores sub obtentu conservandæ libertatis Gallicanæ contra Gregorii VII. Officium reclamarent, quin prius Regis consensum obtinuissent.

§. XXV.

Quorundam Franciæ Præsulum oppositio contra præfatum Officium.

Hoc interdicto parumper refrænabatur Parliamentorum audacia, quæ tamen novis viribus aucta est, dum